



ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ ՄՐՑԱԿՑՈՒԹՅԱՆ ՊԱՇՏՊԱՆՈՒԹՅԱՆ ՀԱՆՁՆԱԺՈՂՈՎ

Ո Ր Ո Շ ՈՒ Մ

14 դեկտեմբերի 2021 թվականի թիվ 358-Ա

«ԻՄՊԵՐԻԱԼ ՊԱԼԱՍ ՀՈԹԵԼ» ՍԱՀՄԱՆԱՓԱԿ ՊԱՏԱՍԽԱՆԱՏՎՈՒԹՅԱՄԲ ԸՆԿԵՐՈՒԹՅԱՆ ԵՎ ՖԻԶԻԿԱԿԱՆ ԱՆՁ ՎԱԼԵՆՏԻՆ ՍԱՐԳՍՅԱՆԻ ՆԿԱՏՄԱՄԲ ՊԱՏԱՍԽԱՆԱՏՎՈՒԹՅԱՆ ՄԻՋՈՑ ԿԻՐԱՌԵԼՈՒ ՄԱՍԻՆ

Մրցակցության պաշտպանության հանձնաժողովը (այսուհետ նաև՝ **Հանձնաժողով**) 2021 թվականի դեկտեմբերի 14-ի նիստում, քննարկելով «Իմպերիալ Պալաս Հոթել» սահմանափակ պատասխանատվությամբ ընկերության (այսուհետ նաև՝ **Ընկերություն**) և ֆիզիկական անձ Վալենտին Սարգսյանի նկատմամբ պատասխանատվության միջոց կիրառելու մասին հարցը,

Պ Ա Ր Զ Ե Ց

1. Վարույթի ընթացքի հակիրճ նկարագրությունը.

Հանձնաժողովը 2021 թվականի հոկտեմբերի 5-ին ««Իմպերիալ Պալաս Հոթել» սահմանափակ պատասխանատվությամբ ընկերության և ֆիզիկական անձ Վալենտին Սարգսյանի կողմից տնտեսական մրցակցության բնագավառում իրավախախտման վերաբերյալ վարույթ հարուցելու մասին» թիվ 276-Ա որոշմամբ (այսուհետ նաև՝ **Թիվ 276-Ա որոշում**) հարուցել է վարույթ (այսուհետ նաև՝ **Վարույթ**):

2. Վարույթով մասնակիցների դիրքորոշումները.

Ֆիզիկական անձ Վալենտին Սարգսյանի դիրքորոշումը.

Ֆիզիկական անձ Վալենտին Սարգսյանը 2021 թվականի դեկտեմբերի 9-ին Հանձնաժողով ներկայացված գրությամբ հայտնել է, որ իրեն վերագրվող խախտումը՝ 2019 թվականի մարտի 25-ի համակենտրոնացումը (ֆիզիկական անձ Վալենտին Սարգսյանի կողմից «Իմպերիալ Պալաս Հոթել» սահմանափակ պատասխանատվությամբ ընկերության գործունեության, որոշումների կայացման կամ մրցունակության վրա ուղղակիորեն կամ

անուղղակիորեն ազդելու հնարավորություն ձեռք բերելը) «Տնտեսական մրցակցության պաշտպանության մասին» օրենքով (այսուհետ նաև՝ **Օրենք**) սահմանված կարգով չհայտարարագրելու պատճառը հանդիսացել է Օրենքով սահմանված համակենտրոնացման հայտարարագրման պահանջին տեղյակ չլինելը:

Հաշվի առնելով, որ իրավախախտման փաստն ընդունել է և նախկինում իր կողմից նմանատիպ խախտումներ թույլ չեն տրվել, Վալենտին Սարգսյանը խնդրել է Հանձնաժողովին որոշում կայացնելիս հնարավորինս մեղմ մոտենալ:

«Իմպերիալ Պալաս Հոթել» սահմանափակ պատասխանատվությամբ ընկերության դիրքորոշումը.

Ընկերությունը 2021 թվականի դեկտեմբերի 7-ին Հանձնաժողով ներկայացված գրությամբ հայտնել է, որ իրեն վերագրվող խախտումը՝ 2019 թվականի մարտի 25-ի համակենտրոնացումը (ֆիզիկական անձ Վալենտին Սարգսյանի կողմից «Իմպերիալ Պալաս Հոթել» սահմանափակ պատասխանատվությամբ ընկերության գործունեության, որոշումների կայացման կամ մրցունակության վրա ուղղակիորեն կամ անուղղակիորեն ազդելու հնարավորություն ձեռք բերելը) Օրենքով սահմանված կարգով չհայտարարագրելու պատճառը հանդիսացել է Օրենքով սահմանված համակենտրոնացման հայտարարագրման պահանջին տեղյակ չլինելը:

Հաշվի առնելով, որ իրավախախտման փաստն ընդունել է և նախկինում իր կողմից նմանատիպ խախտումներ թույլ չեն տրվել, Ընկերությունը խնդրել է Հանձնաժողովին որոշում կայացնելիս հնարավորինս մեղմ մոտենալ:

3. Հանձնաժողովի կողմից պահանջված և ստացված փաստաթղթերը և այլ տեղեկատվությունը.

1. Հանձնաժողովը 2021 թվականի հուլիսի 6-ին ««Իմպերիալ Պալաս Հոթել» սահմանափակ պատասխանատվությամբ ընկերության և ֆիզիկական անձ Վալենտին Սարգսյանի կողմից տնտեսական մրցակցության բնագավառում իրավախախտման վերաբերյալ վարույթ հարուցելու մասին» թիվ 150-Ա որոշմամբ հարուցել է վարույթ (այսուհետ՝ **Վարույթ 1**): Վարույթ 1-ը Հանձնաժողովի 2021 թվականի հոկտեմբերի 5-ի թիվ 275-Ա որոշմամբ կարճվել է իրավախախտման դեպքի բացակայության հիմքով, հաշվի առնելով, որ Վալենտին Սարգսյանի կողմից Ընկերության կանոնադրական կապիտալի 100 տոկոս բաժնեմասի ձեռքբերման գործարքը գործողության մեջ դնելու պահին գործարքի մասնակիցների միջև առկա են եղել անձանց խմբի հատկանիշներ՝ Վալենտին Սարգսյանի և Արմենուհի Լիպարիտի Մալխասյանի միջև 2019 թվականի մարտի 25-ին կնքված Հանձնարարության պայմանագրի (այսուհետ՝ **Հանձնարարության պայմանագիր**) գործողության ուժով:

2. Ընկերության կողմից 2021 թվականի ապրիլի 30-ին Վարույթ 1-ի շրջանակում Հանձնաժողով ներկայացված տեղեկատվության համաձայն՝ Ընկերությունը գործունեություն է իրականացնում հյուրանոցային ծառայությունների մատուցման ոլորտում: Ընկերության 2018 թվականի ֆինանսական տարվա ակտիվների արժեքը կազմել է
դրամ, իսկ հասույթի չափը՝ դրամ:

3. Վարույթ 1-ի շրջանակում Հանձնաժողով ներկայացված տեղեկատվության համաձայն, մինչև գործարքի իրականացումը Վալենտին Սարգսյանի և Արմենուհի Լիպարիտի Մալխասյանի միջև 2019 թվականի մարտի 25-ին կնքվել է Հանձնարարության պայմանագիր, որի շրջանակներում Վալենտին Սարգսյանը իրականացրել է մասնակցի լիազորություններից բխող որոշակի լիազորություններ՝ այնուհետև գնելով Ընկերության բաժնեմասը: Մասնավորապես՝ Վալենտին Սարգսյանը Պայմանագրի 1.1-ին կետի համաձայն՝ պարտավորվել է Արմենուհի Լիպարիտի Մալխասյանի անունից և ի շահ նրան իրականացնել «Իմպերիալ Պալաս Հոթել» սահմանափակ պատասխանատվությամբ ընկերության մասնակցի հետևյալ գործառույթները՝ Ընկերության տնօրենի նշանակում, նրա լիազորությունների վաղաժամկետ դադարեցում, Ընկերության աուդիտ իրականացնող անձի հաստատում, Ընկերության ներքին գործունեությունը կարգավորող փաստաթղթերի ընդունում, Ընկերության գործունեության հիմնական ուղղությունները փոփոխելու կամ նոր գործունեության ուղղություններ ավելացնելու առաջարկությունների ներկայացում, ժողովի որոշումների քննարկմանը մասնակցություն: Որպես Հանձնարարության պայմանագրով վերապահված լիազորությունների իրացման մասին տեղեկատվություն ֆիզիկական անձ Վալենտին Սարգսյանի կողմից Հանձնաժողով են ներկայացվել աուդիտորական ընկերության հետ պայմանագրի կնքման, Ընկերության ներքին գործունեությունը կարգավորող փաստաթղթերի փաթեթի մշակման, Ընկերության գործունեության հիմնական ուղղությունների զարգացման մասին փաստաթղթեր:

4. Հանձնաժողովի կողմից Արդարադատության նախարարության իրավաբանական անձանց պետական ռեգիստրի գործակալության պաշտոնական էլեկտրոնային համակարգում իրականացված ուսումնասիրության արդյունքում պարզ է դարձել, որ

:

4. *Գործի բազմակողմանի, լրիվ և օբյեկտիվ քննարկման արդյունքում Հանձնաժողովը հաստատված է համարում հետևյալ փաստական հանգամանքները.*

1. Վալենտին Սարգսյանի և Արմենուհի Լիպարիտի Մալխասյանի միջև Հանձնարարության պայմանագրի կնքման ուժով Վալենտին Սարգսյանը ձեռք է բերել Ընկերության գործունեության, որոշումների կայացման կամ մրցունակության վրա ուղղակիորեն կամ անուղղակիորեն ազդելու հնարավորություն:

2. Ընկերությունը գործունեություն է իրականացնում հյուրանոցային ծառայությունների մատուցման ոլորտում:

3. Ընկերության 2018 թվականի ֆինանսական տարվա ակտիվների արժեքը կազմել է
դրամ, իսկ հասույթի չափը՝ դրամ:

4. Ֆիզիկական անձ Վալենտին Սարգսյանի և Ընկերության միջև գործարքի իրականացման պահին ֆիզիկական անձ Վալենտին Սարգսյանը չի զբաղվել

ծեռնարկատիրական գործունեությամբ և որևէ տնտեսավարող սուբյեկտի կանոնադրական կապիտալում մասնակցություն չի ունեցել:

5. Ֆիզիկական անձ Վալենտին Սարգսյանի և Ընկերության միջև գործարքի գործողության մեջ դնելու պահի դրությամբ նրանց միջև անձանց խմբի հատկանիշներ առկա չեն եղել:

6.

:

5. Վարչական վարույթի փաստական հանգամանքների և վերաբերելի իրավական նորմերի ուսումնասիրության և վերլուծության արդյունքում Հանձնաժողովը եզրահանգում է հետևյալին.

««Տնտեսական մրցակցության պաշտպանության մասին» օրենքում փոփոխություն կատարելու մասին» 2021 թվականի մարտի 3-ի ՀՕ-92-Ն օրենքի (ուժի մեջ է մտել 2021 թվականի մայիսի 31-ին) 1-ին հոդվածով «Տնտեսական մրցակցության պաշտպանության մասին» օրենքը շարադրվել է նոր խմբագրությամբ:

Մինչև 2021 թվականի մայիսի 31-ը գործող խմբագրությամբ Օրենքի 8-րդ հոդվածի 1-ին մասի 5-րդ կետի համաձայն՝ տնտեսավարող սուբյեկտների համակենտրոնացում է համարվում տնտեսավարող սուբյեկտների ցանկացած գործարք, գործողություն, վերակազմակերպում կամ վարքագիծ, որի շնորհիվ տնտեսավարող սուբյեկտն ուղղակիորեն կամ անուղղակիորեն կազդի այլ տնտեսավարող սուբյեկտի որոշումների կայացման կամ մրցունակության վրա կամ կարող է ուղղակիորեն կամ անուղղակիորեն ազդել մեկ ուրիշի որոշումների կայացման կամ մրցունակության վրա:

Մինչև 2021 թվականի մայիսի 31-ը գործող խմբագրությամբ Օրենքի 8-րդ հոդվածի 7-րդ մասի համաձայն՝ համակենտրոնացումը կայացվում է՝

1) միևնույն ապրանքային շուկայում (հորիզոնական համակենտրոնացում).

2) որոշակի փոխկապակցվածություն ունեցող տարբեր ապրանքային շուկաներում (ուղղահայաց համակենտրոնացում).

3) տարբեր ապրանքային շուկաներում (խառը համակենտրոնացում):

Մինչև 2021 թվականի մայիսի 31-ը գործող խմբագրությամբ Օրենքի 9-րդ հոդվածից բխում է, որ տնտեսավարող սուբյեկտների համակենտրոնացումը, մինչև գործողության մեջ դնելը, ենթակա է հայտարարագրման, եթե՝ համակենտրոնացման մասնակիցների ակտիվների կամ հասույթի ընդհանուր արժեքը (չափը) կամ մասնակիցներից առնվազն մեկի ակտիվների կամ հասույթի արժեքը (չափը) դրա ստեղծմանը նախորդող վերջին ֆինանսական տարում գերազանցել է Հանձնաժողովի 2016 թվականի դեկտեմբերի 16-ի «Հայտարարագրման ենթակա համակենտրոնացումների մասնակցի (մասնակիցների) ակտիվների և հասույթ(ներ)ի արժեքը (չափը) սահմանելու, տնտեսավարող սուբյեկտների համակենտրոնացման հայտարարագրման կարգի հայտարարագրի ձևի մասին» թիվ 478-Ն որոշմամբ սահմանված ակտիվների կամ հասույթ(ներ)ի արժեքը (չափը):

Մինչև 2021 թվականի մայիսի 31-ը գործող խմբագրությամբ Օրենքի 10-րդ հոդվածի 4-րդ մասի 1-ին ենթակետի համաձայն՝ արգելվում է հայտարարագրման ենթակա համակենտրոնացումը գործողության մեջ դնելը՝ մինչև Հանձնաժողովի կողմից որոշում կայացնելը (չհայտարարագրված համակենտրոնացում):

Վերոգրյալ իրավակարգավորումներին նույնաբովանդակ դրույթներ նախատեսված են նաև Օրենքի 13-րդ, 15-րդ, 73-րդ հոդվածներով:

Վերը նշված նորմերի վերլուծությունից հետևում է, որ տնտեսվարող սուբյեկտների կողմից կատարված ցանկացած գործարք, գործողություն կամ վերակազմակերպում ենթակա է հայտարարագրման հետևյալ պայմանների միաժամանակյա առկայության դեպքում՝

1) եթե դրա շնորհիվ տնտեսվարող սուբյեկտն ուղղակիորեն կամ անուղղակիորեն կազդի այլ տնտեսվարող սուբյեկտի որոշումների կայացման կամ մրցունակության վրա կամ կարող է ուղղակիորեն կամ անուղղակիորեն ազդել մեկ ուրիշի որոշումների կայացման կամ մրցունակության վրա,

2) համակենտրոնացման մասնակիցների ակտիվների կամ հասույթի ընդհանուր արժեքը (չափը) կամ մասնակիցներից առնվազն մեկի ակտիվների կամ հասույթի արժեքը (չափը) դրա ստեղծմանը նախորդող վերջին ֆինանսական տարում գերազանցել է Հանձնաժողովի 2016 թվականի դեկտեմբերի 16-ի թիվ 478-Ն որոշմամբ սահմանված ակտիվների կամ հասույթ(ներ)ի արժեքը (չափը):

Մինչև 2021 թվականի մայիսի 31-ը գործող խմբագրությամբ Օրենքի 8-րդ հոդվածի 6-րդ մասի համաձայն՝ սույն հոդվածի 1-ին մասի 5-րդ կետի դեպքում համակենտրոնացման մասնակիցներ են համարվում իրավահարաբերության մասնակից տնտեսվարող սուբյեկտները:

Մինչև 2021 թվականի մայիսի 31-ը գործող խմբագրությամբ Օրենքի 10-րդ հոդվածի 2-րդ մասի համաձայն՝ Հանձնաժողովը հայտարարագրման ենթակա համակենտրոնացումը գնահատելիս հաշվի է առնում տնտեսական մրցակցությունը խոչընդոտելու, այդ թվում՝ գերիշխող դիրքի հանգեցնելու կամ գերիշխող դիրքն ամրապնդելու կամ մրցակցային պայմանների վատթարացման հանգամանքները:

Վերոնշյալ նորմերի վերլուծությունից հետևում է, որ եթե Հանձնաժողովի ուսումնասիրությունների արդյունքում չհայտարարագրված համակենտրոնացումը հանգեցրել է համապատասխան ապրանքային շուկայում մրցակցության կանխման, սահմանափակման, արգելման կամ այլ կերպ վատթարացման կամ սպառողների շահերի վնասման, առաջացրել կամ ամրապնդել է գերիշխող դիրքը, ապա այդ համակենտրոնացումը Հանձնաժողովի որոշմամբ կհամարվի արգելված համակենտրոնացում:

5.1) Ընկերության և ֆիզիկական անձ Վալենտին Սարգսյանի կողմից իրավախախտում կատարված լինելու հարցի կապակցությամբ.

Սույն գործի փաստերի համաձայն 2019 թվականի մարտի 25-ին Վալենտին Սարգսյանի և Արմենուհի Լիպարիտի Մալխասյանի միջև Հանձնարարության պայմանագրի

կնքման ուժով Վալենտին Սարգսյանը ձեռք է բերել Ընկերության գործունեության, որոշումների կայացման կամ մրցունակության վրա ուղղակիորեն կամ անուղղակիորեն ազդելու հնարավորություն: Ընկերության 2018 թվականի ֆինանսական տարվա ակտիվների արժեքը կազմել է դրամ, իսկ հասույթի չափը՝

դրամ: Ընկերության և Վալենտին Սարգսյանի միջև գործարքի գործողության մեջ դնելու պահին նրանց միջև անձանց խմբի հատկանիշներ առկա չեն եղել:

Վերոնշյալից հետևում է, որ 2019 թվականի մարտի 25-ին Վալենտին Սարգսյանի և Արմենուհի Լիպարիտի Մալխասյանի միջև Հանձնարարության պայմանագրի կնքման ուժով ֆիզիկական անձ Վալենտին Սարգսյանի կողմից Ընկերության գործունեության, որոշումների կայացման կամ մրցունակության վրա ուղղակիորեն կամ անուղղակիորեն ազդելու հնարավորության ձեռքբերման գործարքը հանդիսացել է համակենտրոնացում, որը ենթակա է եղել հայտարարագրման, քանի որ «Իմպերիալ Պալաս Հոթել» սահմանափակ պատասխանատվությամբ ընկերության 2018 թվականի ակտիվների արժեքը գերազանցել է Հանձնաժողովի 2016 թվականի դեկտեմբերի 16-ի թիվ 478-Ն որոշմամբ սահմանված ակտիվների արժեքը, մինչդեռ այն չի հայտարարագրվել:

Վերոնշյալի հաշվառմամբ Հանձնաժողովը հաստատված է համարում Ընկերության և ֆիզիկական անձ Վալենտին Սարգսյանի կողմից իրավախախտում կատարած լինելը, մասնավորապես՝ ֆիզիկական անձ Վալենտին Սարգսյանի և «Իմպերիալ Պալաս Հոթել» սահմանափակ պատասխանատվությամբ ընկերության կողմից 2019 թվականի մարտի 25-ի հայտարարագրման ենթակա համակենտրոնացումը մինչև գործողության մեջ դնելը չհայտարարագրելը, որի կապակցությամբ օրենսդրությամբ նախատեսված է իրավական հետևանք՝ պատասխանատվության միջոցի կիրառում:

Սույն գործի նյութերից հետևում է, որ Ընկերությունը գործունեություն է իրականացնում հյուրանոցային ծառայությունների մատուցման ոլորտում: Ֆիզիկական անձ Վալենտին Սարգսյանը գործարքի իրականացման պահին չի զբաղվել ձեռնարկատիրական գործունեությամբ և որևէ տնտեսավարող սուբյեկտի կանոնադրական կապիտալում մասնակցություն չի ունեցել, ուստի՝ 2019 թվականի մարտի 25-ին Վալենտին Սարգսյանի և Արմենուհի Լիպարիտի Մալխասյանի միջև Հանձնարարության պայմանագրի կնքման ուժով Վալենտին Սարգսյանի կողմից Ընկերության գործունեության, որոշումների կայացման կամ մրցունակության վրա ուղղակիորեն կամ անուղղակիորեն ազդելու հնարավորության ձեռքբերման գործարքը հայտարարագրվելու դեպքում ենթակա կլիներ գնահատման որպես խառը համակենտրոնացում:

Համակենտրոնացման՝ արգելման ենթակա չլինելու հարցի կապակցությամբ.

Հաշվի առնելով, որ 2019 թվականի մարտի 25-ին Վալենտին Սարգսյանի և Արմենուհի Լիպարիտի Մալխասյանի միջև Հանձնարարության պայմանագրի կնքման ուժով Վալենտին Սարգսյանի կողմից «Իմպերիալ Պալաս Հոթել» սահմանափակ պատասխանատվությամբ ընկերության գործունեության, որոշումների կայացման կամ մրցունակության վրա ուղղակիորեն կամ անուղղակիորեն ազդելու հնարավորության ձեռքբերման գործարքը հայտարարագրվելու դեպքում ենթակա կլիներ գնահատման որպես խառը

համակենտրոնացում, Հանձնաժողովն արձանագրում է, որ համակենտրոնացումը չի հանգեցրել ապրանքային շուկայում տնտեսական մրցակցության կանխման, սահմանափակման, արգելման, այլ կերպ վատթարացման, տնտեսավարող սուբյեկտի գերիշխող դիրքի առաջացման կամ ամրապնդման, չի վնասել սպառողների շահերը, ուստի Ընկերության և ֆիզիկական անձ Վալենտին Սարգսյանի կողմից 2019 թվականի մարտի 25-ի չհայտարարագրված համակենտրոնացումը արգելված համարելու հիմքերը բացակայում են:

5.2) Համակենտրոնացման մասնակիցների նկատմամբ պատասխանատվության միջոց կիրառելու հարցի կապակցությամբ.

Օրենքի 92-րդ հոդվածի համաձայն՝ տնտեսական մրցակցության բնագավառում իրավախախտման համար Հանձնաժողովն իրավասու է տնտեսավարող սուբյեկտներին, պետական մարմիններին և դրանց պաշտոնատար անձանց տալու նախազգուշացում կամ նշանակելու տուգանք:

Օրենքի 93-րդ հոդվածի 5-րդ մասի համաձայն՝ համակենտրոնացումը չհայտարարագրելու համար նշանակվող տուգանքի չափը կազմում է մինչև հինգ միլիոն դրամ:

Օրենքի 94-րդ հոդվածի 1-ին մասի համաձայն՝ պատասխանատվության միջոց կիրառելիս Հանձնաժողովը հաշվի է առնում տվյալ իրավախախտման բնույթը, տևողությունը, իրավախախտման հնարավոր կամ փաստացի ազդեցությունը շուկայում մրցակցային իրավիճակի կամ սպառողների շահերի վրա, տնտեսավարող սուբյեկտի կողմից տվյալ խախտման կրկնակիությունը, եթե նախորդ խախտման համար պատասխանատվության միջոց կիրառելու օրվանից չի անցել հինգ տարի, տնտեսավարող սուբյեկտի դիտավորության աստիճանը, տնտեսավարող սուբյեկտի կողմից իրավախախտում կատարվելու շարժառիթները և հանգամանքները, տնտեսավարող սուբյեկտի կողմից իրավախախտում կատարվելու փաստն ընդունելու կամ Հանձնաժողովի հետ համագործակցելու հանգամանքը, պատասխանատվությունից ազատելու հիմքերը, տնտեսավարող սուբյեկտի վրա նշանակվող տուգանքի հնարավոր ազդեցությունը, տվյալ տնտեսավարող սուբյեկտի գործունեության ոլորտը և տնտեսավարող սուբյեկտի պատմությունը:

Նույնաբովանդակ դրույթներ են նախատեսված նաև մինչև 2021 թվականի մայիսի 31-ը գործող խմբագրությամբ Օրենքի 31-րդ և 36-րդ հոդվածներով:

Ընկերության և ֆիզիկական անձ Վալենտին Սարգսյանի նկատմամբ պատասխանատվության միջոց կիրառելիս Հանձնաժողովը, ի թիվս այլնի, հաշվի է առնում հետևյալ հանգամանքները.

ա. իրավախախտման բնույթը. Վալենտին Սարգսյանի և Արմենուհի Լիպարիտի Մալխասյանի միջև Հանձնարարության պայմանագրի կնքման ուժով ֆիզիկական անձ Վալենտին Սարգսյանի կողմից 2019 թվականի մարտի 25-ին «Իմպերիալ Պալաս Հոթել» սահմանափակ պատասխանատվությամբ ընկերության գործունեության, որոշումների կայացման կամ մրցունակության վրա ուղղակիորեն կամ անուղղակիորեն ազդելու

հնարավորության ձեռք բերումը համարվում է չհայտարարագրված խառը համակենտրոնացում, որն արգելված համարելու հիմքերը բացակայում են:

բ. փնտեսավարող սուբյեկտների կողմից իրավախախտում կատարելու շարժառիթները և հանգամանքները. Ընկերությունը և ֆիզիկական անձ Վալենտին Սարգսյանը նշել են, որ անտեղյակ են եղել Օրենքով սահմանված կարգով համակենտրոնացումը հայտարարագրելու օրենսդրական պահանջի մասին, և Օրենքի խախտման դիտավորություն չեն ունեցել:

գ. իրավախախտման հնարավոր կամ փաստացի ազդեցությունը շուկայում մրցակցային իրավիճակի վրա. 2019 թվականի մարտի 25-ին Վալենտին Սարգսյանի և Արմենուհի Լիպարիտի Մալխասյանի միջև Հանձնարարության պայմանագրի կնքման ուժով Վալենտին Սարգսյանի կողմից Ընկերության գործունեության, որոշումների կայացման կամ մրցունակության վրա ուղղակիորեն կամ անուղղակիորեն ազդելու հնարավորության ձեռքբերմամբ դրսևորված գործարքը չի հանգեցրել մրցակցության կանխման, սահմանափակման, արգելման կամ մրցակցության վրա այլ բացասական հետևանքի, գերիշխող դիրքի առաջացման կամ ամրապնդման, չի վնասել սպառողների շահերը, հաշվի առնելով, որ այն հայտարարագրվելու դեպքում ենթակա կլիներ գնահատման որպես խառը համակենտրոնացում:

դ. իրավախախտում կատարելու փաստն ընդունելը.

Վարույթի շրջանակներում ֆիզիկական անձ Վալենտին Սարգսյանը և Ընկերությունը ընդունել են իրավախախտում կատարած լինելու փաստը:

Այսպիսով, վերոնշյալ հանգամանքների համադրության արդյունքում՝ Հանձնաժողովն արձանագրում է, որ Ընկերությանը և ֆիզիկական անձ Վալենտին Սարգսյանին անհրաժեշտ է տալ նախազգուշացում:

6. Եզրափակիչ մաս.

Հիմք ընդունելով վերոգրյալը և ղեկավարվելով Օրենքի 37-րդ հոդվածի 1-ին մասի 3-րդ կետով, 90-րդ հոդվածի 1-ին մասի 1-ին կետով, 67-րդ հոդվածի 2-րդ մասով, «Վարչարարության հիմունքների և վարչական վարույթի մասին» օրենքի 70-րդ և 71-րդ հոդվածներով, Հայաստանի Հանրապետության վարչական դատավարության օրենսգրքի 72-րդ հոդվածի 1-ին մասի 1-ին կետով՝ Հանձնաժողովը

Ո Ր Ո Շ Ե Ց

1. «Իմպերիալ Պալաս Հոթել» սահմանափակ պատասխանատվությամբ ընկերության և ֆիզիկական անձ Վալենտին Սարգսյանի կողմից 2019 թվականի մարտի 25-ի համակենտրոնացումը Օրենքով սահմանված կարգով չհայտարարագրելը որակել որպես չհայտարարագրված համակենտրոնացում (այսուհետ՝ **Օրենքի խախտում**):

2. Օրենքի խախտման համար «Իմպերիալ Պալաս Հոթել» սահմանափակ պատասխանատվությամբ ընկերությանը տալ նախազգուշացում:

3. Օրենքի խախտման համար ֆիզիկական անձ Վալենտին Սարգսյանին տալ նախազգուշացում:

4. Սույն որոշումը «Իմպերիալ Պալաս Հոթել» սահմանափակ պատասխանատվությամբ ընկերության և ֆիզիկական անձ Վալենտին Սարգսյանի նկատմամբ յուրաքանչյուրի մասով ուժի մեջ է մտնում դրա պատճենը համապատասխանաբար «Իմպերիալ Պալաս Հոթել» սահմանափակ պատասխանատվությամբ ընկերությանը և ֆիզիկական անձ Վալենտին Սարգսյանին հանձնելուն հաջորդող օրվանից:

5. Սույն որոշումը կարող է բողոքարկվել վարչական կամ դատական կարգով՝ ուժի մեջ մտնելու օրվանից երկամսյա ժամկետում:

6. Սույն որոշման բողոքարկումը չի կասեցնում դրա գործողությունը կամ կատարումը:

ՆԱԽԱԳԱՀ

Գ. ԳԵՎՈՐԳՅԱՆ

2021 թ. դեկտեմբերի 14
Երևան